



UNDANG-UNDANG MALAYSIA

Akta A1589

**AKTA MAKTAB KERJASAMA (PEMERBADANAN)
(PINDAAN) 2019**

Tarikh Perkenan Diraja	14 Mac 2019
Tarikh penyiaran dalam <i>Warta</i>	20 Mac 2019

Hakcipta Pencetak (H)

PERCETAKAN NASIONAL MALAYSIA BERHAD

Semua Hak Terpelihara. Tiada mana-mana bahagian jua daripada penerbitan ini boleh diterbitkan semula atau disimpan di dalam bentuk yang boleh diperolehi semula atau disiarkan dalam sebarang bentuk dengan apa jua cara elektronik, mekanikal, fotokopi, rakaman dan/atau sebaliknya tanpa mendapat izin daripada **Percetakan Nasional Malaysia Berhad (Pencetak kepada Kerajaan Malaysia yang dilantik)**.

UNDANG-UNDANG MALAYSIA

Akta A1589

AKTA MAKTAB KERJASAMA (Pemerbadanan) (Pindaan) 2019

Suatu Akta untuk mengadakan peruntukan bagi teks bahasa kebangsaan Akta Maktab Kerjasama (Perbadanan) (Pindaan) 2011, dan untuk meminda Akta Maktab Kerjasama (Pemerbadanan) 1968 dan Co-operative College (Incorporation) Act 1968.

[]

DIPERBUAT oleh Parlimen Malaysia seperti yang berikut:

BAHAGIAN I

PERMULAAN

Tajuk ringkas dan permulaan kuat kuasa

1. (1) Akta ini bolehlah dinamakan Akta Maktab Kerjasama (Pemerbadanan) (Pindaan) 2019.

(2) Bahagian II Akta ini disifatkan telah mula berkuat kuasa pada 1 September 2011.

(3) Bahagian III dan IV Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

BAHAGIAN II

PINDAAN KEPADA TEKS BAHASA KEBANGSAAN
AKTA MAKTAB KERJASAMA (PERBADANAN) (PINDAAN) 2011

Penggantian seksyen 2 hingga 13

2. Teks bahasa kebangsaan Akta Maktab Kerjasama (Perbadanan) (Pindaan) 2011 [*Akta A1398*], yang disebut “Akta ibu” dalam Bahagian II Akta ini, dipinda dengan menggantikan seksyen 2 hingga 13 dengan seksyen yang berikut:

‘Penggantian seksyen 2

2. Akta Maktab Kerjasama (Pemerbadanan) 1968 [*Akta No. 35 tahun 1968*], yang disebut “Akta ibu” dalam Akta ini, dipinda dengan menggantikan seksyen 2 dengan seksyen yang berikut:

“Tafsiran

2. Dalam Akta ini, melainkan jika konteksnya menghendaki makna yang lain—

“Ketua Pengarah” ertinya Ketua Pengarah Maktab yang dilantik di bawah subseksyen 4L(1);

“Kumpulan Wang Rizab” ertinya Kumpulan Wang Rizab yang ditubuhkan di bawah seksyen 7A;

“Kumpulan Wang Simpanan Bercarum” ertinya Kumpulan Wang Simpanan Bercarum yang ditubuhkan di bawah seksyen 7B;

“Lembaga” ertinya Lembaga Maktab Koperasi Malaysia yang ditubuhkan di bawah seksyen 4B;

“Maktab” ertinya Maktab Koperasi Malaysia yang ditubuhkan di bawah seksyen 3;

“Menteri” ertinya Menteri yang dipertanggungjawabkan dengan tanggungjawab bagi pembangunan koperasi;

“tahun kewangan” ertinya tempoh dari satu hari bulan Januari hingga tiga puluh satu hari bulan Disember dalam sesuatu tahun.”.

Penggantian seksyen 3

3. Akta ibu dipinda dengan menggantikan seksyen 3 dengan seksyen yang berikut:

“Penubuhan Maktab Koperasi Malaysia

3. (1) Suatu pertubuhan perbadanan dengan nama “Co-operative College of Malaysia” atau, dalam bahasa kebangsaan, “Maktab Koperasi Malaysia” ditubuhkan.

(2) Maktab adalah kekal turun-temurun dan mempunyai meterai perbadanan.

(3) Maktab boleh membawa guaman dan dibawa guaman terhadapnya atas nama perbadanannya.

(4) Tertakluk kepada dan bagi maksud Akta ini, Maktab boleh, atas apa-apa terma sebagaimana yang difikirkannya patut—

(a) membuat kontrak;

(b) memperoleh, membeli, mengambil, memegang dan menikmati harta alih dan tak alih yang boleh menjadi terletak hak padanya melalui pembelian, atau melalui apa-apa pertukaran, pemberian, derma, pajakan, pemberian berwasiat atau selainnya;

(c) memindahhakkan, menyerahhakkan, menyerahkan balik, memulangkan, menggadaikan, menjual, menggadaijanjikan, memajak, menukarkan, menyerahhakkan semula, memindahkan hakmilik atau selainnya melupuskan, atau membuat urusan mengenai, apa-apa harta alih atau tak alih apa-apa perihalan atau apa-apa kepentingan dalamnya yang terletak hak pada Maktab atas apa-apa terma sebagaimana yang difikirkannya patut; dan

(d) menjalankan, melaksanakan dan menunaikan, mengikut peruntukan Akta ini, segala kuasa, fungsi dan kewajipan yang diberikan, diperuntukkan atau dikenakan ke atas Maktab oleh mana-mana peruntukan.”.

Penggantian seksyen 4

4. Akta ibu dipinda dengan menggantikan seksyen 4 dengan seksyen yang berikut:

“Fungsi Maktab

4. Fungsi Maktab adalah seperti yang berikut:

- (a) untuk menyediakan suatu kursus dalam pengajian koperasi dan apa-apa kursus pengajian lain dan membuat apa-apa penganugerahan diploma sebagaimana yang difikirkan patut oleh Maktab;
- (b) untuk mencetak atau menerbitkan, atau membantu dalam pencetakan atau penerbitan, buku tentang koperasi atau apa-apa mata pelajaran yang berkaitan dengannya;
- (c) untuk membuat apa-apa kaedah-kaedah sebagaimana yang perlu untuk mengawal selia tanggungjawab dan kawalan pegawai dan kakitangan Maktab dan untuk mengenakan apa-apa fi yang kena dibayar berkenaan dengan apa-apa kursus pengajian sebagaimana yang difikirkannya patut;
- (d) untuk menjalankan penyelidikan mengenai perkara-perkara koperasi;
- (e) untuk menyediakan perkhidmatan perundingan;
- (f) untuk menjalankan kursus dalam pengajian koperasi dan apa-apa kursus pengajian lain, secara bersesama atau bersekutu, gabungan, usaha sama atau selainnya, dengan mana-mana institusi pendidikan tinggi atau badan profesional, atau mana-mana pertubuhan, di dalam atau di luar Malaysia; dan
- (g) untuk menasihati Menteri mengenai perkara-perkara yang berkaitan dengan latihan dan pendidikan koperasi.”.

Seksyen baharu 4A hingga 4P

5. Akta ibu dipinda dengan memasukkan selepas seksyen 4 seksyen yang berikut:

“Kuasa Maktab

4A. Maktab hendaklah, tertakluk kepada peruntukan Akta ini, mempunyai kuasa untuk—

- (a) menganugerahkan diploma, sijil dan kelayakan yang setaraf kepada orang yang mengikuti kursus pengajian yang dikendalikan oleh Maktab dan telah memenuhi apa-apa kehendak lain sebagaimana yang ditentukan oleh Lembaga, atau sebagaimana yang boleh ditetapkan;
- (b) memulakan dan menganugerahkan biasiswa, dermasiswa, pingat, hadiah dan bentuk lain bagi kepujian, anugerah atau bantuan berkenaan dengan latihan, pendidikan dan perkhidmatan berasaskan pengetahuan yang disediakan oleh Maktab;
- (c) memberikan pinjaman atau bantuan kewangan untuk pelajar yang memerlukan mengikut apa-apa terma dan syarat sebagaimana yang diluluskan oleh Lembaga;
- (d) memasarkan atau mengkomersialkan perkhidmatan,apatan penyelidikan dan keluaran Maktab;
- (e) meminta dan menerima apa-apa fi sebagaimana yang boleh dari semasa ke semasa ditentukan oleh Lembaga atau sebagaimana yang ditetapkan;
- (f) melakukan apa-apa perkara, sama ada yang bersampingan dengan kuasa itu atau tidak, yang boleh dilakukan bagi pengembangan pendidikan, latihan, kewangan, pentadbiran, kebajikan dan tatatertib dalam Maktab; dan
- (g) menubuhkan atau menggalakkan penubuhan syarikat di bawah Akta Syarikat 1965 [*Akta 125*] untuk menjalankan atau terlibat dalam apa-apa aktiviti yang telah dirancang atau dijalankan oleh Maktab dengan kelulusan Menteri Kewangan.

Lembaga Maktab

4B. (1) Maktab hendaklah ditadbirkan oleh Lembaga Maktab yang terdiri daripada anggota yang berikut:

- (a) Pengerusi;
- (b) Pengerusi Eksekutif Suruhanjaya Koperasi Malaysia sebagai Timbalan Pengerusi;
- (c) Ketua Pengarah Maktab;
- (d) seorang wakil Perbendaharaan;
- (e) seorang wakil Kementerian yang bertanggungjawab bagi pembangunan koperasi;
- (f) seorang wakil Angkatan Koperasi Kebangsaan Malaysia Berhad (ANGKASA);
- (g) enam orang yang mewakili pergerakan koperasi; dan
- (h) tiga orang lain yang, pada pendapat Menteri, mempunyai kelayakan atau pengalaman dalam perkara yang berhubungan dengan pembangunan, pengendalian atau kebajikan Maktab.

(2) Anggota yang disebut dalam perenggan (1)(a), (d), (e), (f), (g) dan (h)—

- (a) hendaklah dilantik oleh Menteri selama tempoh tidak melebihi dua tahun; dan
- (b) hendaklah layak untuk dilantik semula apabila habis tempoh jawatannya.

(3) Seorang pegawai kanan Maktab hendaklah dilantik oleh Lembaga sebagai Setiausaha kepada Lembaga tetapi tidak mempunyai hak untuk mengundi.

(4) Anggota Lembaga yang dilantik di bawah perenggan (1)(a), (d), (e), (f), (g) dan (h) boleh pada bila-bila masa meletakkan jawatannya melalui surat yang dialamatkan kepada Menteri.

(5) Jika seseorang anggota yang dilantik di bawah perenggan (1)(a), (d), (e), (f), (g) dan (h) terhenti menjadi anggota Lembaga, Menteri boleh melantik seorang yang lain untuk mengisi kekosongan itu bagi baki tempoh yang anggota yang mengosongkan jawatan itu dilantik.

(6) Tertakluk kepada Akta ini, Lembaga boleh menentukan tatacaranya sendiri.

Kehilangan kelayakan daripada menjadi anggota Lembaga

4c. Seseorang hendaklah hilang kelayakan daripada dilantik atau menjadi anggota Lembaga—

(a) jika dibuktikan terhadapnya, atau dia telah disabitkan atas suatu pertuduhan berkenaan dengan—

(i) suatu kesalahan yang melibatkan fraud, kecurangan atau keburukan akhlak;

(ii) suatu kesalahan di bawah undang-undang yang berhubungan dengan rasuah;

(iii) suatu kesalahan di bawah Akta ini; atau

(iv) apa-apa kesalahan lain yang boleh dihukum dengan pemenjaraan (sama ada pemenjaraan sahaja atau sebagai tambahan kepada atau sebagai ganti denda) selama tempoh lebih daripada dua tahun;

(b) jika dia menjadi bankrap; atau

(c) jika dia telah didapati atau diisytiharkan sebagai tidak sempurna akal atau selainnya menjadi tidak berupaya untuk menguruskan hal ehwalnya.

Penjalanan sementara fungsi Pengerusi

4d. (1) Jika Pengerusi atas apa-apa sebab tidak berupaya untuk melaksanakan fungsinya atau semasa mana-mana tempoh kekosongan jawatan Pengerusi, Timbalan Pengerusi hendaklah melaksanakan fungsi Pengerusi.

(2) Jika kedua-dua Pengerusi dan Timbalan Pengerusi atas apa-apa sebab tidak berupaya untuk melaksanakan fungsi Pengerusi atau semasa apa-apa tempoh kekosongan jawatan Pengerusi dan Timbalan Pengerusi, Menteri boleh melantik mana-mana anggota Lembaga untuk melaksanakan fungsi Pengerusi.

(3) Timbalan Pengerusi atau anggota yang dilantik di bawah subseksyen (2), mengikut mana-mana yang berkenaan, hendaklah, semasa tempoh dia melaksanakan fungsi Pengerusi di bawah seksyen ini, disifatkan sebagai Pengerusi dan hendaklah mempunyai segala kuasa Pengerusi.

Pengosongan jawatan

4E. Jawatan seseorang anggota Lembaga yang disebut dalam subseksyen 4B(1) hendaklah menjadi kosong—

- (a) apabila anggota itu mati;
- (b) apabila anggota itu meletakkan jawatan melalui surat yang dialamatkan kepada Menteri; atau
- (c) apabila habis tempoh atau pembatalan pelantikannya.

Pembatalan pelantikan

4F. (1) Menteri boleh membatalkan pelantikan seseorang anggota Lembaga yang disebut dalam perenggan (1)(a), (d), (e), (f), (g) dan (h)—

- (a) jika kelakuannya, sama ada yang berkaitan dengan tugasnya sebagai anggota Lembaga atau selainnya, ialah kelakuan yang memburukkan nama Lembaga atau Maktab;
- (b) jika dia menjadi tidak berupaya untuk menjalankan dengan sepatutnya tugasnya sebagai anggota Lembaga;
- (c) jika dibuktikan terhadapnya, atau dia telah disabitkan atas, suatu pertuduhan berkenaan dengan—
 - (i) suatu kesalahan yang melibatkan fraud, kecurangan atau keburukan akhlak;

- (ii) suatu kesalahan di bawah undang-undang yang berhubungan dengan rasuah;
 - (iii) suatu kesalahan di bawah Akta ini; atau
 - (iv) apa-apa kesalahan lain yang boleh dihukum dengan pemenjaraan (sama ada pemenjaraan sahaja atau sebagai tambahan kepada atau sebagai ganti denda) selama tempoh lebih daripada dua tahun;
- (d) jika dia menjadi bankrap;
- (e) jika dia telah didapati atau diisytiharkan sebagai tidak sempurna akal atau selainnya menjadi tidak berupaya untuk menguruskan hal ehwalnya; atau
- (f) jika dia tidak menghadiri mesyuarat Lembaga tiga kali berturut-turut tanpa mendapat kebenaran secara bertulis daripada Pengerusi, atau dalam hal Pengerusi, tanpa kebenaran Menteri.

(2) Walau apa pun subseksyen (1), pelantikan mana-mana anggota boleh pada bila-bila masa dibatalkan oleh Menteri tanpa memberikan sebab bagi pembatalan itu.

Mesyuarat Lembaga

4G. (1) Lembaga hendaklah bermesyuarat seberapa kerap yang perlu tetapi tidak kurang daripada empat kali setahun bagi maksud mempertimbangkan aktivitinya.

(2) Kuorum Lembaga ialah tujuh.

(3) Jika atas apa-apa persoalan untuk ditentukan oleh Lembaga terdapat undi yang sama rata, Pengerusi hendaklah mempunyai undi pemutus.

(4) Lembaga hendaklah menyebabkan minit semua mesyuaratnya disenggarakan dan disimpan dalam bentuk yang sepatutnya.

(5) Apa-apa minit mesyuarat Lembaga yang dibuat hendaklah, jika ditandatangani sewajarnya oleh Pengerusi, diterima sebagai keterangan dalam semua prosiding undang-undang

tanpa bukti selanjutnya dan tiap-tiap mesyuarat Lembaga yang berkenaan dengannya minit mesyuarat telah dibuat hendaklah disifatkan sebagai telah dipanggil dan diadakan dengan sewajarnya dan semua anggota dalam mesyuarat itu layak dengan sewajarnya untuk bertindak.

Penzahiran kepentingan

4H. (1) Seseorang anggota Lembaga yang mempunyai, secara langsung atau tidak langsung, dengan sendiri atau melalui pekongsinya—

- (a) apa-apa kepentingan dalam mana-mana syarikat atau perusahaan yang dengannya Lembaga bercadang untuk membuat kontrak; atau
- (b) apa-apa kepentingan dalam mana-mana kontrak itu atau dalam apa-apa perkara yang sedang dibincangkan oleh Lembaga,

hendaklah dizahirkan kepada Lembaga mengenai hakikat dan jenis kepentingannya.

(2) Penzahiran di bawah subseksyen (1) hendaklah direkodkan dalam minit mesyuarat Lembaga dan, melainkan jika dibenarkan secara khusus oleh Pengerusi, anggota itu tidak boleh mengambil bahagian dalam apa-apa pertimbangtelitian atau keputusan Lembaga yang berhubungan dengan kontrak atau perkara itu.

(3) Tiada tindakan atau prosiding Lembaga boleh ditidaksahkan atas alasan bahawa mana-mana anggota Lembaga telah melanggar seksyen ini.

Lembaga boleh mengundang orang lain dalam mesyuarat

4I. (1) Lembaga boleh mengundang mana-mana orang untuk menghadiri mesyuarat atau pertimbangtelitian Lembaga bagi maksud menasihati Lembaga mengenai apa-apa perkara yang sedang dibincangkan tetapi orang itu tidak berhak untuk mengundi dalam mesyuarat atau pertimbangtelitian itu.

(2) Seseorang yang diundang di bawah subseksyen (1) boleh dibayar apa-apa elaun sebagaimana yang ditentukan oleh Lembaga.

Elaun

4J. Anggota Lembaga yang dilantik di bawah subseksyen 4B(1) dan anggota mana-mana jawatankuasa yang dilantik di bawah seksyen 5A boleh dibayar apa-apa elaun sebagaimana yang ditentukan oleh Menteri.

Kesahan tindakan dan prosiding

4K. Tiada tindakan yang dilakukan atau prosiding yang diambil di bawah Akta ini boleh dipersoalkan atas alasan—

- (a) suatu kekosongan dalam keanggotaan, atau kecacatan dalam perlembagaan, Lembaga; atau
- (b) suatu peninggalan, kecacatan atau ketidakteraturan yang tidak menyentuh merit kes itu.

Pelantikan Ketua Pengarah

4L. (1) Menteri hendaklah melantik seorang Ketua Pengarah atas apa-apa terma dan syarat sebagaimana yang ditentukan oleh Menteri.

(2) Ketua Pengarah hendaklah memegang jawatan selama tempoh yang tidak melebihi tiga tahun dan adalah layak untuk dilantik semula.

(3) Lembaga hendaklah meletakkan pada Ketua Pengarah apa-apa kuasa dan hendaklah mengenakan ke atasnya apa-apa kewajipan sebagaimana yang ditentukan oleh Lembaga.

Pelantikan pegawai dan kakitangan

4M. (1) Maktab boleh melantik, atas apa-apa terma dan syarat perkhidmatan sebagaimana yang diluluskan oleh Lembaga, apa-apa bilangan Timbalan Ketua Pengarah, pegawai dan kakitangan lain, sebagaimana yang perlu untuk menjalankan maksud Maktab.

(2) Timbalan Ketua Pengarah hendaklah tertakluk kepada arahan dan kawalan Ketua Pengarah dan boleh melaksanakan segala kewajipan Ketua Pengarah di bawah Akta ini.

Cawangan Maktab

4N. (1) Lembaga boleh menubuhkan dan menyenggarakan apa-apa cawangan atau cawangan-cawangan Maktab di mana-mana tempat atau tempat-tempat di Malaysia atau di mana-mana jua sebagaimana yang Lembaga berpendapat bahawa adalah wajar bagi maksud menjalankan peruntukan Akta ini.

(2) Lembaga hendaklah melantik berkenaan dengan suatu cawangan, seorang Pengarah Cawangan yang hendaklah menjadi ketua eksekutif, pegawai pentadbiran dan akademik cawangan, dan dia hendaklah melaksanakan fungsinya dan menunaikan kewajibannya di bawah arahan dan kawalan Ketua Pengarah.

Kuasa Menteri untuk memberikan arahan

4O. (1) Lembaga hendaklah bertanggungjawab kepada Menteri.

(2) Menteri boleh memberikan kepada Lembaga arahan yang bersifat am yang selaras dengan peruntukan Akta ini, yang berhubungan dengan pelaksanaan fungsi dan penjalanan kuasa Lembaga.

(3) Lembaga hendaklah melaksanakan segala arahan yang diberikan di bawah seksyen ini secepat yang dapat dilaksanakan.

Meterai perbadanan Maktab

4P. (1) Meterai perbadanan Maktab boleh dari semasa ke semasa dipecahkan, ditukarkan, diubah dan dibuat baharu sebagaimana yang difikirkan patut oleh Lembaga.

(2) Meterai perbadanan Maktab hendaklah disimpan dalam jagaan Ketua Pengarah dan hendaklah digunakan dengan kebenaran Lembaga.

(3) Meterai perbadanan Maktab hendaklah dicapkan pada semua diploma dan sijil dan ditandatangani oleh—

- (a) Ketua Pengarah atau, semasa ketiadaannya, seorang anggota lain Lembaga yang diberi kuasa secara bertulis oleh Lembaga; dan
- (b) mana-mana orang lain yang diberi kuasa oleh Lembaga,

dan tandatangan itu hendaklah menjadi keterangan yang mencukupi bahawa meterai itu telah dicapkan dengan sewajarnya dan sepatutnya dan bahawa meterai itu adalah meterai Maktab yang sah.

(4) Meterai Maktab hendaklah diberikan pengiktirafan rasmi dan kehakiman.

(5) Apa-apa dokumen atau surat cara yang jika disempurnakan oleh seseorang yang bukan suatu pertubuhan perbadanan tidak dikehendaki supaya dimeterai boleh disempurnakan mengikut cara yang serupa oleh Maktab; dan apa-apa dokumen atau surat cara itu boleh disempurnakan bagi pihak Maktab oleh Ketua Pengarah, atau oleh mana-mana orang yang diberi kuasa secara bertulis oleh Lembaga secara am atau khusus.”.

Penggantian seksyen 5

6. Akta ibu dipinda dengan menggantikan seksyen 5 dengan seksyen yang berikut:

“Jawatankuasa Pengajian

5. (1) Bagi maksud menjalankan fungsinya di bawah perenggan 4(a), Lembaga hendaklah melantik suatu Jawatankuasa Pengajian yang hendaklah membuat syor kepada Lembaga mengenai sukatan pelajaran yang sesuai yang dikehendaki berkenaan dengan apa-apa kursus pengajian, cara bagaimana peperiksaan bagi penganugerahan apa-apa diploma berkenaan dengan apa-apa kursus pengajian boleh dikendalikan, dan mengenai apa-apa perkara lain yang berhubungan dengan apa-apa kursus pengajian sebagaimana yang boleh dirujuk oleh Maktab kepada Jawatankuasa Pengajian.

(2) Jawatankuasa Pengajian hendaklah termasuk orang yang berikut:

- (a) Ketua Pengarah yang hendaklah menjadi Pengerusi Jawatankuasa Pengajian;
- (b) Timbalan Ketua Pengarah;
- (c) seorang wakil daripada Suruhanjaya Koperasi Malaysia; dan
- (d) dua orang wakil daripada mana-mana institusi pengajian tinggi.

(3) Seorang pegawai kanan Maktab hendaklah dilantik sebagai Setiausaha kepada Jawatankuasa Pengajian.

(4) Tertakluk kepada apa-apa arahan yang diberikan oleh Maktab, Jawatankuasa Pengajian hendaklah menentukan tatacaranya sendiri.

(5) Pengerusi Jawatankuasa Pengajian boleh mengundang mana-mana orang lain untuk menghadiri mesyuarat Jawatankuasa Pengajian untuk memberi nasihat mengenai apa-apa perkara yang berhubungan dengan apa-apa kursus pengajian sebagaimana yang difikirkan patut oleh Jawatankuasa Pengajian.”.

Seksyen baharu 5A

7. Akta ibu dipinda dengan memasukkan selepas seksyen 5 seksyen yang berikut:

“Kuasa Lembaga untuk menubuhkan jawatankuasa lain

5A. Lembaga boleh menubuhkan apa-apa jawatankuasa sebagaimana yang difikirkannya patut dan tertakluk kepada apa-apa arahan oleh Lembaga, suatu jawatankuasa yang dilantik sedemikian hendaklah menentukan tatacaranya sendiri.”.

Seksyen baharu 7A dan 7B

8. Akta ibu dipinda dengan memasukkan selepas seksyen 7 seksyen yang berikut:

“Kumpulan Wang Rizab

7A. (1) Maktab boleh menubuhkan dan menguruskan suatu Kumpulan Wang Rizab.

(2) Tertakluk kepada subseksyen (3), pembayaran ke dalam dan keluar daripada Kumpulan Wang Rizab hendaklah ditentukan oleh Lembaga.

(3) Kumpulan Wang Rizab tidak boleh digunakan selain bagi maksud Maktab.

Kumpulan Wang Simpanan Bercarum

7B. Maktab boleh, dengan kelulusan Menteri dan dengan persetujuan Perbendaharaan, menubuhkan dan menguruskan suatu Kumpulan Wang Simpanan Bercarum bagi Ketua Pengarah yang dilantik di bawah seksyen 4L dan pegawai dan kakitangan yang dilantik di bawah seksyen 4M.”.

Seksyen baharu 8A

9. Akta ibu dipinda dengan memasukkan selepas seksyen 8 seksyen yang berikut:

“Hadiah

8A. (1) Lembaga boleh, bagi pihak Maktab, menerima dengan cara pemberian, hadiah, pemberian berwasiat, bantuan, warisan atau selainnya, apa-apa harta dan wang sebagai bantuan kewangan Maktab atas apa-apa syarat sebagaimana yang ditentukan oleh Lembaga.

(2) Apa-apa harta atau wang yang diterima oleh Maktab di bawah subseksyen (1) hendaklah, tertakluk kepada terma dan syarat yang padanya harta atau wang itu diberikan dan diterima, digunakan oleh Lembaga untuk kesemua atau mana-mana maksud Maktab mengikut Akta ini.

(3) Suatu daftar hendaklah disimpan berkenaan dengan semua harta dan wang yang diterima oleh Lembaga di bawah subseksyen (1), termasuk nama penderma dan apa-apa syarat khas yang padanya harta dan wang itu telah diberikan.

(4) Semua harta dan wang yang diberikan dan diterima bagi apa-apa maksud tertentu hendaklah digunakan dan ditadbirkan mengikut maksud yang baginya harta dan wang itu diberikan dan diterima dan hendaklah diakaunkan secara berasingan.”.

Pindaan seksyen 10

10. Seksyen 10 Akta ibu dipinda dengan menggantikan perkataan “Majlis” di mana-mana jua terdapat dengan perkataan “Lembaga”.

Pindaan seksyen 11

11. Seksyen 11 Akta ibu dipinda dalam subseksyen (2), dengan menggantikan perkataan “Majlis” dengan perkataan “Lembaga”.

Pindaan seksyen 12

12. Seksyen 12 Akta ibu dipinda dalam subseksyen (1), dengan menggantikan perkataan “Majlis” dengan perkataan “Lembaga”.

Seksyen baharu 12A hingga 12G

13. Akta ibu dipinda dengan memasukkan selepas seksyen 12 seksyen yang berikut:

“Akta Perlindungan Pihak Berkuasa Awam 1948

12A. Akta Perlindungan Pihak Berkuasa Awam 1948 [*Akta 198*] hendaklah terpakai bagi apa-apa tindakan, guaman, pendakwaan atau prosiding terhadap Maktab atau terhadap Lembaga, mana-mana anggota Lembaga, mana-mana anggota jawatankuasa, atau mana-mana pegawai, kakitangan atau ejen Maktab berkenaan dengan apa-apa perbuatan, pengabaian atau keingkaran yang dilakukan oleh Maktab atau olehnya, mengikut mana-mana yang berkenaan, atas sifat yang sedemikian.

Pekhidmat awam

12B. Tiap-tiap anggota Lembaga, atau mana-mana pegawai, kakitangan atau ejen Maktab, semasa menunaikan kewajipannya di bawah Akta ini sebagai anggota, pegawai, kakitangan atau ejen itu, hendaklah disifatkan sebagai pekhidmat awam mengikut pengertian Kanun Keseksaan [*Akta 574*].

Obligasi kerahsiaan

12c. (1) Kecuali bagi maksud Akta ini atau apa-apa prosiding sivil atau jenayah di bawah mana-mana undang-undang bertulis, seseorang anggota Lembaga, atau mana-mana pegawai, kakitangan atau ejen Maktab, mana-mana anggota jawatankuasa, atau mana-mana orang yang diundang untuk menghadiri mana-mana mesyuarat Lembaga atau mana-mana jawatankuasa, tidak boleh menzahirkan apa-apa maklumat yang telah diperolehnya semasa menjalankan kewajipannya dan yang tidak disiarkan menurut Akta ini.

(2) Mana-mana orang yang melanggar subseksyen (1) melakukan suatu kesalahan dan boleh, apabila disabitkan, didenda tidak melebihi sepuluh ribu ringgit atau dipenjarakan selama tempoh tidak melebihi enam bulan atau kedua-duanya.

Prosiding sivil

12D. Walau apa pun peruntukan mana-mana undang-undang bertulis yang berlawanan, dalam apa-apa prosiding sivil oleh atau terhadap Maktab atau dalam apa-apa prosiding lain yang dalamnya Maktab dikehendaki atau dibenarkan oleh mahkamah untuk diwakili, atau didengari, atau selainnya berhak untuk diwakili atau didengari, mana-mana orang atau pegawai Maktab yang diberi kuasa bagi pihak itu melalui arahan khas atau am Ketua Pengarah, boleh bagi pihak Maktab, memulakan prosiding itu atau hadir dalam dan mengendalikan prosiding itu dan boleh membuat semua kehadiran dan permohonan dan melakukan semua perbuatan berkenaan dengan prosiding itu bagi pihak Maktab.

Perbuatan atau peninggalan yang dilakukan dengan suci hati

12E. Tiada tindakan atau guaman boleh dibawa, dimulakan atau dikekalkan dalam mana-mana mahkamah terhadap—

- (a) Lembaga;
- (b) anggota Lembaga;
- (c) Maktab;
- (d) mana-mana pegawai atau kakitangan Maktab; atau
- (e) mana-mana orang yang bertindak secara sah bagi pihak Maktab,

bagi apa-apa perbuatan atau peninggalan yang dilakukan atau ditinggalkan dengan suci hati pada menjalankan atau menunaikan kuasa atau kewajipannya di bawah Akta ini atas kepercayaan yang munasabah bahawa adalah perlu bagi maksud yang diniatkan untuk disampaikan.

Kuasa Lembaga untuk membuat kaedah-kaedah dan garis panduan

12F. (1) Lembaga boleh membuat apa-apa kaedah-kaedah dan garis panduan sebagaimana yang perlu bagi maksud menguatkuasakan peruntukan Akta ini.

(2) Secara khususnya, dan tanpa menjejaskan keluasan subseksyen (1), kaedah-kaedah dan garis panduan itu boleh memperuntukkan kesemua atau mana-mana perkara yang berikut:

- (a) fungsi dan tugas pegawai dan kakitangan;
- (b) penentuan kehendak yang mengawal selia pengiktirafan dan penganugerahan diploma, sijil dan kelayakan yang setaraf untuk diberikan oleh Maktab;
- (c) syarat dan kemasukan dan kebajikan pelajar;

- (d) borang yang dikehendaki bagi maksud Akta ini; dan
- (e) apa-apa perkara yang tergolong dalam kuasa Maktab di bawah seksyen 4A.

Kuasa Menteri untuk membuat peraturan-peraturan

12G. Menteri boleh membuat peraturan-peraturan—

- (a) yang memperuntukkan tata tertib pelajar Maktab, termasuk menetapkan kesalahan tata tertib, hukuman tata tertib dan tatacara bagi prosiding tata tertib; dan
- (b) mengenai apa-apa perkara sebagaimana yang suai manfaat atau perlu bagi melaksanakan peruntukan Akta ini dengan lebih baik.” ’.

BAHAGIAN III

PINDAAN KEPADA AKTA MAKTAB KERJASAMA (PEMERBADANAN) 1968 [AKTA NO. 35 TAHUN 1968]

Pindaan tajuk panjang

3. Akta Maktab Kerjasama (Pemerbadanan) 1968 [*Akta No. 35 tahun 1968*], yang disebut “Akta ibu” dalam Bahagian ini, dipinda dalam tajuk panjang dengan menggantikan perkataan “Maktab Kerjasama” dengan perkataan “Institut Koperasi”.

Pindaan am

4. Kecuali bagi seksyen 13, Akta ibu dipinda dengan menggantikan perkataan “Maktab” di mana-mana jua terdapat termasuk dalam nota bahu dengan perkataan “Institut”.

Pindaan seksyen 1

5. Subseksyen 1(1) Akta ibu dipinda dengan menggantikan perkataan “Maktab Kerjasama” dengan perkataan “Institut Koperasi”.

Pentafsiran sebutan mengenai Akta ibu

6. Jika, pada dan selepas permulaan kuat kuasa Bahagian ini, suatu sebutan dibuat dalam mana-mana undang-undang bertulis mengenai “Akta Maktab Kerjasama (Pemerbadanan) 1968”, sebutan itu hendaklah ditafsirkan sebagai sebutan mengenai “Akta Institut Koperasi (Pemerbadanan) 1968”.

Sebutan mengenai “Maktab” di bawah Akta Maktab Kerjasama (Pemerbadanan) 1968

7. Apa-apa sebutan mengenai “Maktab” yang ditubuhkan di bawah Akta Maktab Kerjasama (Pemerbadanan) 1968 dalam mana-mana undang-undang bertulis atau dokumen hendaklah, apabila Akta ini mula berkuat kuasa, ditafsirkan sebagai sebutan mengenai Institut Koperasi Malaysia.

Pindaan seksyen 3

8. Subseksyen 3(1) Akta ibu dipinda dengan menggantikan perkataan “College” dengan perkataan “Institute”.

Pindaan seksyen 7

9. Subseksyen 7(1) Akta ibu dipinda—

- (a) dengan menggantikan perkataan “Maktab Kerjasama” dengan perkataan “Institut Koperasi”;
- (b) dengan memotong perkataan “dan” di hujung perenggan (a);
- (c) dengan menggantikan noktah di hujung perenggan (b) dengan perkataan “; dan”; dan
- (d) dengan memasukkan selepas perenggan (b) perenggan yang berikut:
 - “(c) hendaklah dibayar kepadanya wang yang diterima daripada Kumpulan Wang Amanah Pendidikan Koperasi.”.

Peruntukan kecualian dan peralihan

10. (1) Pertukaran nama daripada “Maktab Koperasi Malaysia” kepada “Institut Koperasi Malaysia” apabila mula berkuat kuasanya Bahagian ini tidak akan menyentuh apa-apa kuasa, hak, keistimewaan, tanggungan, kewajipan atau obligasi Maktab Koperasi Malaysia atau mencatatkan apa-apa prosiding undang-undang oleh atau terhadapnya.

(2) Apa-apa prosiding undang-undang yang boleh diteruskan atau dimulakan oleh atau terhadap Maktab Koperasi Malaysia sebelum mula berkuat kuasanya Bahagian ini bolehlah diteruskan atau dimulakan pada dan selepas mula berkuat kuasanya Bahagian ini atas nama Institut Koperasi Malaysia.

(3) Segala surat ikatan, dokumen dan surat cara lain yang disempurnakan oleh Maktab Koperasi Malaysia di bawah meterai perbadanan “Maktab Koperasi Malaysia” sebelum mula berkuat kuasanya Bahagian ini hendaklah terus berkuat kuasa dan berkesan sepenuhnya apabila Bahagian ini mula berkuat kuasa.

(4) Mana-mana orang yang merupakan anggota Lembaga, Jawatankuasa Pengajian atau mana-mana jawatankuasa Maktab Koperasi Malaysia sebaik sebelum mula berkuat kuasanya Bahagian ini hendaklah, pada permulaan kuat kuasa Bahagian ini, terus menjadi anggota Lembaga, Jawatankuasa Pengajian atau mana-mana jawatankuasa Institut Koperasi Malaysia, mengikut mana-mana yang berkenaan.

(5) Semua pegawai dan kakitangan yang dilantik oleh Maktab Koperasi Malaysia sebaik sebelum mula berkuat kuasanya Bahagian ini hendaklah, pada permulaan kuat kuasa Bahagian ini, disifatkan telah dilantik oleh Institut Koperasi Malaysia atas terma dan syarat perkhidmatan yang tidak kurang baiknya daripada terma dan syarat perkhidmatan yang terpakai bagi pegawai dan kakitangan itu sebaik sebelum mula berkuat kuasanya Bahagian ini.

(6) Jika perubahan telah dibuat pada dan selepas permulaan kuat kuasa Bahagian ini, berkenaan dengan syarat perkhidmatan pegawai dan kakitangan Institut Koperasi Malaysia yang disifatkan di bawah subseksyen (5) telah dilantik oleh Institut, pegawai dan kakitangan itu hendaklah diberi suatu pilihan sama ada untuk terus tertakluk kepada syarat perkhidmatan yang sedia ada atau menjadi tertakluk kepada syarat baharu perkhidmatan.

(7) Segala wang yang terkandung dalam atau yang kena dibayar ke dalam Kumpulan Wang Maktab Kerjasama Malaysia yang ditubuhkan di bawah Akta ibu hendaklah, pada permulaan kuat kuasa Bahagian ini, dipindahkan ke dalam dan disifatkan menjadi sebahagian daripada Kumpulan Wang Institut Koperasi Malaysia.

(8) Apa-apa aset, syer dan tanggungan lain kepunyaan Kumpulan Wang Maktab Kerjasama Malaysia sebaik sebelum permulaan kuat kuasa Bahagian ini hendaklah menjadi, pada permulaan kuat kuasa Bahagian ini, aset, syer dan tanggungan Kumpulan Wang Institut Koperasi Malaysia.

(9) Segala wang yang terkandung dalam Kumpulan Wang Rizab dan Kumpulan Wang Simpanan Bercarum Maktab Koperasi Malaysia hendaklah, pada permulaan kuat kuasa Bahagian ini, dipindahkan ke dalam dan disifatkan menjadi sebahagian daripada Kumpulan Wang Rizab dan Kumpulan Wang Simpanan Bercarum Institut Koperasi Malaysia.

BAHAGIAN IV

PINDAAN KEPADA CO-OPERATIVE COLLEGE (INCORPORATION) ACT 1968 [ACT 437]

Pindaan tajuk panjang

11. Co-operative College (Incorporation) Act 1968 [Act 437], yang disebut “Akta ibu” dalam Bahagian ini, dipinda dalam tajuk panjang dengan menggantikan perkataan “College” dengan perkataan “Institute”.

Pindaan am

12. Kecuali bagi seksyen 13, Akta ibu dipinda dengan menggantikan perkataan “College” di mana-mana jua terdapat termasuk dalam nota bahu dengan perkataan “Institute”.

Pindaan seksyen 1

13. Subseksyen 1(1) Akta ibu dipinda dengan menggantikan perkataan “Co-operative College” dengan perkataan “Co-operative Institute”.

Pentafsiran sebutan mengenai Akta ibu

14. Jika, pada dan selepas permulaan kuat kuasa Bahagian ini, suatu sebutan dibuat dalam mana-mana undang-undang bertulis mengenai “Co-operative College (Incorporation) Act 1968”, sebutan itu hendaklah ditafsirkan sebagai sebutan mengenai “Co-operative Institute (Incorporation) Act 1968”.

Sebutan mengenai “College” di bawah Co-operative College (Incorporation) Act 1968

15. Apa-apa sebutan mengenai “College” yang ditubuhkan di bawah Co-operative College (Incorporation) Act 1968 dalam mana-mana undang-undang bertulis atau dokumen hendaklah, apabila Akta ini mula berkuat kuasa, ditafsirkan sebagai sebutan mengenai Co-operative Institute of Malaysia.

Pindaan seksyen 7

16. Subseksyen 7(1) Akta ibu dipinda—

- (a) dengan memotong perkataan “and” di hujung perenggan (a);
- (b) dengan menggantikan noktah di hujung perenggan (b) dengan perkataan “; and”; dan
- (c) dengan memasukkan selepas perenggan (b) perenggan yang berikut:

“(c) into which shall be paid sums received from the Co-operative Societies Education Trust Fund.”.

Peruntukan kecualian dan peralihan

17. (1) Pertukaran nama daripada “Co-operative College of Malaysia” kepada “Co-operative Institute of Malaysia” apabila mula berkuat kuasanya Bahagian ini tidak akan menyentuh apa-apa kuasa, hak, keistimewaan, tanggungan, kewajipan atau obligasi Co-operative College of Malaysia atau mencatatkan apa-apa prosiding undang-undang oleh atau terhadapnya.

(2) Apa-apa prosiding undang-undang yang boleh diteruskan atau dimulakan oleh atau terhadap Co-operative College of Malaysia sebelum mula berkuat kuasanya Bahagian ini bolehlah diteruskan atau dimulakan pada dan selepas mula berkuat kuasanya Bahagian ini atas nama Co-operative Institute of Malaysia.

(3) Segala surat ikatan, dokumen dan surat cara lain yang disempurnakan oleh Co-operative College of Malaysia di bawah meterai perbadanan “Co-operative College of Malaysia” sebelum mula berkuat kuasanya Bahagian ini hendaklah terus berkuat kuasa dan berkesan sepenuhnya apabila Bahagian ini mula berkuat kuasa.

(4) Mana-mana orang yang merupakan anggota Lembaga, Jawatankuasa Pengajian atau mana-mana jawatankuasa Co-operative College of Malaysia sebaik sebelum mula berkuat kuasanya Bahagian ini hendaklah, pada permulaan kuat kuasa Bahagian ini, terus menjadi anggota Lembaga, Jawatankuasa Pengajian atau mana-mana jawatankuasa Co-operative Institute of Malaysia, mengikut mana-mana yang berkenaan.

(5) Semua pegawai dan kakitangan yang dilantik oleh Co-operative College of Malaysia sebaik sebelum mula berkuat kuasanya Bahagian ini hendaklah, pada permulaan kuat kuasa Bahagian ini, disifatkan telah dilantik oleh Co-operative Institute of Malaysia atas terma dan syarat perkhidmatan yang tidak kurang baiknya daripada terma dan syarat perkhidmatan yang terpakai bagi pegawai dan kakitangan itu sebaik sebelum mula berkuat kuasanya Bahagian ini.

(6) Jika perubahan telah dibuat pada dan selepas permulaan kuat kuasa Bahagian ini, berkenaan dengan syarat perkhidmatan pegawai dan kakitangan Co-operative Institute of Malaysia yang disifatkan di bawah subseksyen (5) telah dilantik oleh Institute, pegawai dan kakitangan itu hendaklah diberi suatu pilihan sama ada untuk terus tertakluk kepada syarat perkhidmatan yang sedia ada atau menjadi tertakluk kepada syarat baharu perkhidmatan.

(7) Segala wang yang terkandung dalam atau yang kena dibayar ke dalam Co-operative College of Malaysia Fund yang ditubuhkan di bawah Akta ini hendaklah, pada permulaan kuat kuasa Bahagian ini, dipindahkan ke dalam dan disifatkan menjadi sebahagian daripada Co-operative Institute of Malaysia Fund.

(8) Apa-apa aset, syer dan tanggungan lain kepunyaan Co-operative College of Malaysia Fund sebaik sebelum permulaan kuat kuasa Bahagian ini hendaklah menjadi, pada permulaan kuat kuasa Bahagian ini, aset, syer dan tanggungan Co-operative Institute of Malaysia Fund.

(9) Segala wang yang terkandung dalam Kumpulan Wang Rizab dan Kumpulan Wang Simpanan Bercarum Co-operative College of Malaysia hendaklah, pada permulaan kuat kuasa Bahagian ini, dipindahkan ke dalam dan disifatkan menjadi sebahagian daripada Kumpulan Wang Rizab dan Kumpulan Wang Simpanan Bercarum Co-operative Institute of Malaysia.